


丹陽縣志

ル 5
3284
7



門 几 5
第 3284
卷 7

丹陽縣志卷二十

丹陽縣志卷二十

儒林

自聖門列四科而後世史書遂有儒林文苑之目然一邑之中千百年來名稱其實者蓋鮮德行未必無言語政事豈不由文學舉其大不必及其細見於前無庸贅於後苟非實有可徵亦何可以虛名炫世不敢收亦不得傳也志儒林第十八

文苑附

漢

包咸字子良少為諸生師事博士右師細君習魯詩論語王莽末自長安歸鄉里遂為赤眉賊所執晨夜誦

昭和十八年
八月十八日
購求

經自若賊異而遣之往東海立精舍教授光武卽位
舉孝廉除郎中授皇太子論語累遷大鴻臚每進見
賜以几杖經傳有疑輒遣小黃門就問顯宗以咸有
師傅恩而素清苦俸祿視諸卿加厚咸以給諸生之
貧者病篤帝親臨視年七十一卒於官著有論語章
句魯詩章句子福拜郎中亦以論語入授和帝

吳

韋昭字宏嗣少好學能文嘗作孝經註會稽王卽位諸
葛恪薦爲太史令景帝時爲中書郎博士祭酒孫皓
時封高陵亭侯遷中書僕射侍中領左國史時所在

數言瑞應皓以問昭昭答曰此家人筐篋間物耳又
皓欲爲父和作紀昭以文皇未登帝位當立傳不當
爲紀皓滋不悅初皓飲羣臣酒率以七升爲限昭飲
不過二升始見禮異常爲裁減或密賜茶菹以當酒
至是寵衰更見偏彊昭益憂懼求去終以嫌忿收殺
之

晉

薛瑩字文潔治經術嘗召入東觀撰後漢記

唐

蕭德言字文行思話從孫引之子明左氏春秋仕陳爲

岳陽王賓客陳亡入隋官校書郎貞觀時歷著作郎
宏文館學士奉詔與魏徵虞世南褚亮編次經史百
世帝王興衰之故上之帝愛其書賞賚甚渥又詔授
太子經兼侍讀封武陽縣侯請老不許德言晚尤篤
學每開經輒被濯束帶危坐妻子以爲勞曰對先聖
之言何復憚勞進秘書少監卒年九十七贈太常卿
諡曰博

蕭穎士字茂挺梁鄱陽王七世孫四歲屬文十歲補太
學生觀書一覽卽成誦開元二十三年舉進士第一
天寶初補秘書正字時裴耀卿席豫張均宋遙韋述

皆先進甚器重之由是名播天下執業者甚眾號蕭
夫子因事劾免旋召爲集賢校理宰相李林甫欲見
之不詣嘗依春秋義類編年起漢初迄隋末爲傳百
篇書魏高貴鄉公崩曰司馬昭弑帝書陳受禪曰陳
霸先反餘類是倭人入朝言國人願得蕭夫子爲師
中書舍人張漸等諫不可而止嘗作伐櫻桃賦以詆
李林甫史官韋述薦穎士自代召詣史館待制穎士
以林甫威福自擅遂不屈免官往來鄆杜間林甫死
調河南府參軍事安祿山寵恣卽託疾入少華山走
諸鎮陳守禦計永王璘召之不往與宰相崔圓書計

盜當起東南未幾劉展果反客死汝南年五十二門人謚曰文元先生子存字伯誠亮直有父風能文辭與梁肅顏真卿友善韓愈少爲存所知及存卒愈爲恤其孤女

宋

翟濤其先開封人徙丹陽爲長洲令通三傳精禮樂制度論者謂濤能以宋儒之理兼漢儒之學祀鄉賢尹焯字彥明師事程伊川紹聖中常應舉試策議誅元祐諸臣不對而出告程子曰焯不復應進士舉矣程子曰子有母在焯歸告其母母曰吾知汝以善養不

知汝以祿養焯意遂決靖康元年以种師道薦召至京師不欲留賜號和靖處士而歸次年金人陷洛闔門遇害焯死復甦門人昇至山谷中得免建炎四年劉豫使僞帥以禮聘焯不從則以兵恐之焯自商州奔蜀止於涪涪程子讀易地也關三畏齋以居紹興五年侍讀范冲舉以自代授左宣教郎充崇政殿說書以疾辭冲奏給行資遣漕臣奉詔至涪六年始就道值陳公輔疏攻程氏之學焯至九江上奏曰焯實師頤垂二十年學之既專自信甚篤使焯濫列經筵不敢捨所學以欺君父遂留不進張浚薦焯謂其所

學所養有大過人者乞令江州守臣津送至國門復以疾辭詔以秘書郎兼說書趣起之始入見就職八年除秘書少監著論語孟子解上之未幾求去上語劉大中日焯不特所學淵源且班列中得此老成人是亦朝廷氣象乃以焯直徽猷閣主管萬壽觀留侍經筵資善堂翊善朱震疾亟薦焯自代除太常少卿仍兼說書未幾稱疾在告除權禮部侍郎兼侍講時金人來議和焯上疏言禮曰父母之讐不共戴天兄弟之讐不反兵今陛下信讐敵之譎詐而覩其肯和以紓目前之急豈不失不共戴天不反兵之義乎又

移書秦檜力言其不可皆不報於是焯固辭新命九年以徽猷閣待制提舉萬壽觀兼侍講又辭且陳奏當去之道五疏入提舉江州太平觀轉一官致仕焯自入經筵卽乞休致朝廷以禮留之秦檜見焯議和疏及與檜書已不樂至是遂不復留十二年卒年七十二從祀孔子廟庭並祀鄉賢當是時學於伊川之門者固多君子然若焯者蓋鮮程子嘗以魯許之且曰我死而不失其正者尹氏子也其言行詳於涪陵記善錄

洪興祖字慶善少讀禮至中庸頓悟性命之理文詣日

進登政和上舍第爲湖州士曹改宣教郎高宗駐揚州庶事草創召試秘書省正字後爲太常博士上疏乞收人心納謀策安民情壯國威遷駕部郎官會地震應詔上疏陳朝廷紀綱之失爲時宰所惡主管太平觀起知廣德軍建陂塘六百餘所民無旱憂新學舍定從祀自十哲曾子而下七十有一人先儒左邱明而下二十有六人改知眞州州當兵衝瘡痍未瘳請復民租者再流民復業墾闢荒田七萬餘畝徒知饒州是時秦檜當國諫官多檜門下爭彈劾以媚檜興祖嘗作故龍圖閣學士程瑀論語解序語涉怨望

又嘗與檜論乾坤二卦至上六陰凝於陽必戰興祖謂陰終不可勝陽猶臣終不可勝君嫌於無陽惡夫干己者檜以爲譏己大怒編管昭州卒年六十有六明年詔復其官直敷文閣興祖自少至老未嘗一日去書著老莊本旨周易通義繫辭要旨古文孝經序贊離騷楚詞考異行於世

都潔字聖與父郁精於易理潔世其家學著易體變義十二卷專明變體爲宋儒說易之宗由進士累官吏部郎中太府少卿淮西總領卒祀鄉賢

邵衍字仲昌篤實好學至老不倦大觀四年年八十六

無疾終

湯泳字叔永粹於理學與弟沂同遊考亭之門其答問見文公語類官南廊簿領未赴卒

竇從周字文卿志向冲雅年五十與弟澄從朱子游得操心之要造詣精粹專以為己為學者創一夕盜入其室睥睨久之知為從周居謂其徒無驚此公相率去朱子歎曰忠信可行蠻貊於此益信講道學者以二程夫子擬之卒並祀鄉賢

明

張存字性中幼有殊慧日誦數千言四歲屬對偶五歲

解聲韻之學年十三補博士弟子員從劉基宋濂游遂潛心理學其學務收放心以敬為主讀書窮理數十年一旦豁然開朗覺塵空鏡明山河萬象如視諸掌以明經補遂安主簿未幾棄去徧游名勝歸築虛白廬以老學者稱雪洞先生為明初理學之倡卒祀鄉賢

東桓字子威生有異姿家貧日鮮再食而誦讀不廢鄰母憐而食之為學根究性命務為躬行雖屢挫於時向道彌篤隆慶戊辰以貢授甯州判州泊洞蠻桓親歷其境戒毋得剽掠為賊咸戢服守將倅功請勦桓

力爭之督府業以前議上聞又心折桓言別疏請罷
兵而移罪有司悉左調桓坐是亦調膠州在膠兩權
高密卽墨縣事時時會諸生講性命之學不肯窮追
逋賦然課吏考最上官例取無礙銀桓狀言賦役有
成書徵收有實數安所得無礙者此特奸吏逢迎蒙
蔽耳雖報可而心銜之卒罷歸桓歸家益貧講學益
力歲大饑姜寶移書邑令日子威吾老友薄俸五金
幸致之度此時不能出門戶矣令更益五金遺之桓
以分給族之貧者與丹徒耆儒殷士望月爲會講以
敦本存誠之學引掖後進又設會村社以教力農者

學者稱懷玉先生卒祀鄉賢

眭思永字修年號身壹博雅多才尤用心格致之功邃
於理學兄明允乙酉殉國難思永亦以清節終時論
以爲不愧二難

丁鴻明字子行顧涇陽嘗稱丁生穎悟任生篤實劉生
孝友爲丹陽三布衣劉豫章人寓丹陽者也鴻明深
於易象著易理質疑說行世家貧性尤耿介嘗大雪
絕食袁復初裹糧饋之則端坐待斃而已無怨尤色
豐士廉字介公講學東林從高忠憲游以儒術名於時
周彥文字季純與兄孟純應文仲純繼文從高攀龍遊

稱其能以聖賢語逐一體驗覺字字有味及門有三
周之目

任光祖字希賢布衣平生忠信敦篤從顧涇陽高景逸
講學東林事父母尤至孝高景逸有終身孺慕之稱
郭應詔字明起邑文生從高忠憲攀龍講學東林壯年
卽不應科舉試詩有盛唐風格書法道勁似右軍
周爰字文孝號練溪少失怙事母孝後遭訟株連見責
於邑令復矢志讀書由明經任江西上高教諭昌明
理學爲一時望

睦石號東菴萬曆辛丑進士官翰林院檢討才思敏捷
人以鄒陽枚乘擬之而品學尤粹嘗作僻敬軒胡敬
齋王陽明陳白沙四先生詩以誌景仰在京師時宮
中有郭貴人者其母亦睦姓以舅甥禮請通拒弗許
曰六世而袒免吾家去趙州越六世矣何能序昭穆
耶其耿介如是

荆懋功字元成事親孝率諸弟力學肅然如嚴師伯兄
爲前母出事之尤謹以碩德爲鄉里師從游者悉一
時賢雋萬曆壬寅恩貢授建平訓導改婺源遷崑山
教諭時弟懋賢領鄉薦子之琦成進士並官於朝或
勸勿往懋功曰敦學相長儒者事也況師儒之官爲

朝廷崇教化敢不盡心今子弟有牧民責而余往課士各盡報稱耳奈何以此自阻在崑三年卒祀名宦荆象衡字南瞻崇禎己卯舉人官江都教諭以病免閉門著書精於易理與春秋義例學者稱南山先生

湯三才字中立號心古邑諸生道衡之父精於禮記輯新義補註疏之闕 欽定禮記義疏採其說

國朝

荆子邁字季超順治時歲貢歷任學博三十載所在教育士子稱得人擢峽江知縣告歸嘗取邵子太極圖張子西銘推闡精微暢其意旨大學士熊賜履書其

後以行世

蔣家駒字千里康熙庚午舉人授懷集令釐奸剔弊弭盜安民未幾卒於任生平耿介自持好學不輟於四子書五經三禮皆手錄數過丹黃爛然博采眾說緯以精義同時吳荃字蓀右官縣令亦能以經學名世姜兆錫字上均別號素清學者康熙庚午舉人官中書改蒲圻令親老告歸生平究心於性理經學構軒曰雙桐書屋著書其中者數十年丹黃紙籤貼四壁楹柱皆滿所憑几當肘處髹漆剝落木痕皆陷凡先聖遺經先儒注疏兆錫皆能集其成乾隆丁丑其孫

爽獻其書於朝四庫館俱存日記鄉賢著九經
集註行世

文苑

齊

蕭鈞齊高帝子出繼衡陽王性好學善屬文

梁

蕭統字德施武帝長子也生而聰叡三歲受孝經論語
五歲徧讀五經悉能諷誦引納才學之士討論篇籍
繼以文章著述東宮有書幾三萬卷文學之盛晉宋
以來未之或有性仁孝母丁貴嬪疾衣不解帶及薨

水漿不入口哭輒痛絕腰帶十圍減削過半卒年三
十一謚昭明撰有文籍二十卷古今典誥十卷文章
英華二十卷並文選三十卷傳於世

蕭琛字彥瑜舉秀才累仕至侍中特進金紫光祿大夫
卒年五十二謚曰平琛少朗悟有才辨常言少壯三
好音律書酒年長以來二事都廢惟書籍不衰嘗遇
北僧齋一葫蘆中有漢書序傳乃班固真本琛固求
得之其書多有異今者

蕭子雲字景喬齊豫章王嶷第九子也自幼便有文采
長益勤學以晉代無全書撰晉書一百一十卷奏之

重刊九陽縣志 卷之三
二
詔付秘閣起家秘書郎遷太子舍人又撰上東宮新
記二十卷大同二年以沈約所撰郊廟樂辭舛謬敕
令改撰施用子雲兼善草隸書雅爲高祖所重侯景
之亂東奔晉陵卒于顯靈寺年六十三兄子恪仕至
吳郡太守子範仕至光祿大夫著有文集三十卷子
顯仕至吳興太守著有後漢書一百卷齊書六十卷
普通北伐記五卷貴儉傳三十卷文集二十卷弟子
暉仕至儀同從事中騎長史並以文學名世子特早
知名亦善草隸爲海鹽令坐事免先子雲卒

陳

蕭賁字文奐齊竟陵王子良孫神識耿介幼好學有文
才起家梁湘東王法曹參軍

唐

丁仙芝開元進士官餘杭尉長於詩爲盛唐名家祀鄉
賢

蔡希周與弟希寂同登開元十二年進士並有詩才希
周官至監察御史希寂渭南尉

包融開元中張九齡引爲懷州司馬遷集賢學士大理
司直與賀知章張旭劉脊虛皆有雋名號吳中四傑
子何佶俱能詩世稱二包何字幼嗣天寶七載進士

大厯中爲起居舍人佶字幼正天寶六載進士累官
諫議大夫汴東兩稅使諸道鹽鐵使遷刑部侍郎改
秘書監封丹陽郡公

皇甫冉字茂政十歲便能屬文與弟曾同登天寶十五
載進士對策第一授無錫尉厯右金吾衛兵曹參軍
右補闕以病乞歸卒祀鄉賢曾字孝常大厯中與冉
俱以能詩名人比之張氏景陽孟陽厯官監察御史
左遷舒州司馬陽翟令

許渾字用晦太和六年進士厯當塗太平二縣令旋擢
監察御史出爲睦州郢州刺史卒祀鄉賢渾別墅在

北陵丁卯橋有丁卯集傳世

蔡隱邱進士第尉氏主簿張潮大厯處士張翬開元進
士官校書郎周瑀吏部掌選談戴長洲尉皆盛唐詩
人

殷璠嘗選丹陽集行世

劉太真與兄太冲自宣城移居丹陽善屬文師事蕭穎
士同登天寶末進士由中書舍人轉工部刑部侍郎
貞元四年重九賜宴曲江帝自爲詩命朝臣應制用
清字韻明日於延英門上之上自考定以太真及李
紆爲上等後坐事貶信州刺史卒

宋

吳淑字正儀幼有俊才韓熙載潘佑皆以文章知名見淑深加器重有難於措詞者輒命淑賦述南唐時以校書郎直內史江南平歸朝以近臣薦試學士院授大理評事預修太平御覽太平廣記文苑英華召對便殿歷太府寺丞著作佐郎充秘閣校理嘗獻九絃琴五絃阮頌爲太宗所賞又作事類賦百篇以獻詔令註釋上之累遷起居舍人預修太宗實錄再遷職方員外郎時諸路所上閏年圖皆儀鸞司掌之淑言天下山川險要皆國家急務周禮職方氏掌天下圖

籍漢高祖入關蕭何收秦籍由是周知險要請以今年所納圖上職方又令諸路轉運使每十年畫本路圖以上從之會詔詢禦戎之策淑請用古車戰法上覽而異焉咸平五年卒年五十六淑性好古詞學典雅善筆札工篆籀取說文有字義者千八百餘條撰說文五義三卷子安節讓夷遵路皆進士第遵路自有傳

蔡肇字天啓能爲文長於詩初事王安石繼從蘇軾游聲譽益顯擢元豐二年進士歷明州司戶參軍江陵推官太學正通判常州召爲衛尉寺丞提舉永興路

常平徽宗初入爲戶部員外郎兼修國史旋出提舉
兩浙刑獄張商英當國引爲禮部員外進起居郎拜
中書舍人立試三題宰相上馬遣吏候筆援筆立就
不事潤飾商英讀之擊節未幾罷爲顯謨閣待制知
明州俄落職提舉洞霄宮會赦復官卒祀鄉賢弟載
字天任不樂仕進以詩自娛嘗題無錫錢仲仲漆塘
四亭詩一時傳誦推爲絕唱

葛勝仲字魯卿登紹聖四年進士除兗州教授入爲太
學正上幸學多獻頌者勝仲獨獻賦上命中書第其
優劣勝仲爲第一召權國子監司業遷太常卿詔續

太常因革禮書增爲三百卷及建春宮以勝仲兼諭
德探歷代太子善惡成敗之迹日進數事除國子祭
酒歷知數州有怡蹟忤朱覲罷歸子立方自有傳
葛立方字常之隆興中爲天官侍郎家居著韻語陽秋
凡古人詩悉論斷而歸之正若背理傷道者皆爲說
以示勸戒自號懶真子

蘇嘉字景謨頌之子最知名弱冠遊上庠熙甯中試對
策力言時政之弊直講焦千之擢在首選執政怒千
之嘉亦罷舉父頌知婺州從行過杭蘇軾爲杭倅公
譙外獨與嘉遊累日唱酬盈軸呼以宗弟又以書薦

重刊丹陽縣志 卷之三 五
之亭守楊繪稱嘉篤學有文而沈靜若愚剛毅不可
犯繪亦厚遇之後知襄邑丞蔡京提點開封府深相
接納一日怒黎邑巡檢樊說使嘉廉其過嘉笑曰某
豈爲人鷹犬者耶京意大沮由是遂絕

葛澧咸淳時人嘗著錢塘賦二萬餘言載入浙江臨安
志

范寥字信中嘗爲穎昌府兵馬鈐轄以收藏蘇軾詩文
墨跡貶官寥志尙卓犖屈身武弁志不得伸晚年遂
以詩酒自放

吳致堯字仁聖宣和間爲安化令以事件當路歸次其
所爲文宣和間嘗奏御

湯修年字壽真紹興二十四年進士官揚州教授有文
學以詩名
胡緝字舜舉舉於鄉爲府學正工詩文孫尙書覲稱其
非前輩所及范克信字允誠舉於鄉特恩對策授湘
潭尉廣東經略幕官與緝爲忘年交時有陸坦之字
千里翟起宗字元振蔣元龍字子雲洪江字南紀俱
以文學舉授官有差

顧松年字公茂與蔡天國劉圖南皆一代名士有詩見
京口人文集

葛起耕字君顧號檜庭南宋詩人與劉子泉劉野泉相
唱和

蘇師德字仁仲頌之孫以父任入官歷計幕有詩見京
口人文集

朱斗文字彥章號北湖居士朱公翼字仲殊號後湖居
士皆有詩見京口人文集

湯貧天才明敏時李巢在湖南鄭續鎮廣南俱以書奏
辟晚佐江西鍾傅書檄闡委未嘗有倦色傅女適江
夏杜洪子時已暮遣人走乞障車文貧命小吏四人
各執紙筆倚馬而待四本立成天佑中避難臨川卒

元

顧觀字利賓寓居紹興官星子縣尉少工詩從趙孟頫
遊危素欲薦之館閣元末兵起道阻不果劉彥英極
賞其詩有秋露芙蓉之目

明

孫育字七峯由文生貢太學遊王守溪楊石淙靳介庵
之門皆愛其才以賈洛陽稱之構七峯山房工詩文
翰墨與唐寅祝允明齊名屢困場屋會詔以筆札取
士得直文華殿中書

孫雲翼字禹見萬厯辛卯舉人知廣東龍川縣擢知彝

真修丹陽縣志 卷之三
陵州解綬歸三十年不謁守令左圖右書終日披誦
生平撰述甚富文工齊梁體子廣翁字景疏崇禎壬
午舉人謁選授贊皇知縣興學造士爲士林所稱
荆廷實字實君崇禎癸未進士官兵部武庫主事領樞
要召對殿廷多致忠悃疾作歸嗜學著書選有歷朝
傳文學要分初盛近三集行世

虞玉字玉樹號他山布衣文品意氣凌鑠名流博極羣
書古文追風絕塵自然神駿詩慷慨放逸多類變雅
與東林諸老遊吳門沈去非目爲奇才

賀裳字黃公號槃齋邑文生與吳門張溥楊廷樞執復
社牛耳葺載酒園與名流觴咏其中一時推爲風雅
之宗

賀燕徵字元生號煙叟邑文生幼聰慧課十三經孫吳
握奇經諸書不踰年卒業長益刻勵工古文詞文非
班馬詩非漢魏弗好也入復社與張天如周仲馭楊
維斗諸君子游聲譽益起南都建當事以知兵薦參
贊兵部與馬阮不合棄官歸

姜大昭字和仲崇禎時諸生勝國遺民高才不試詩見
明詩遺稿

姜紹書字晏如號二酉以祖寶蔭南工部郎中甲申後

重刊陽明志 卷之三
文苑
七
紹書以世受國恩黃冠自廢放浪於山巔水涯著書
之外並多藝能凡古今名蹟一經品題價增十倍所
著無聲詩史韻石齋筆談自書刊行

國朝

潘之彪字文山順治丁酉舉人辛丑進士授溫州府推
官缺裁改四川蓬溪令邑當兵燹之餘彪招徠安輯
戶口日增修學課士邑多絃誦已酉王子兩科分校
稱得人識拔遂甯張鵬翮於寒微課以詩書噓植成
立爲當代碩輔後歸里琴書自娛年八十餘絃誦不
輟

馬宇陽字夢白號虛庵崇禎時諸生與陳子龍錢禧爲
幾社名士遂於易理詩亦可傳子驪自有傳

賀國璘字天山邑文生受業於賀裳之門嘗有文載之
選幾於洛陽紙貴詩名尤傾動一時刊有天山文集
蔣清字冷生邑諸生工詩陳維崧序其類稿稱卷軸浩
繁不下十數種

葛暉字念蒼號旭園布衣痛父麟死泖湖之難委懷詩
酒爲遺民以終嘗有句云家貧自況莊周鮒節苦誰
憐蘇武羊蓋紀實也

姜大澄字元暉文生能琴善詩與魏叔子葛東之崔叔

重修丹陽縣志 卷之三
明相友善家道中落猶彈琴咏詩不輟與弟南埜大
申並有名

姜鶴儕字子翥明諸生尙書寶元孫性豪放有雋才一
時名士杜於皇紀伯紫周櫟園龔芝麓王阮亭王西
樵多與之酬咏 國初以事繫獄鶴儕談笑自若釋
歸後亦無怨尤色人皆服其雅量仁和王暉今世說
列入德行門

馬驪字彪仲號西青布衣高才博學撰述繁富每一書
出世爭寶之

賀璘字斌如號梅清康熙癸丑貢生廷試授教職少與
張天如楊維斗結復社名噪一時國志正續多錄其
文詩集則張素存陳其年爲之點定

吳思祖字哀人號雲谷邑文生才名籍甚與平江蔡九
霞長洲尤展成句曲張鹿牀里人潘之彪稱莫逆交
詩古文亦與之相伯仲

姜大珣號韋庵邑文生士昌之孫性冲澹好詞章家藏
先世彝器書畫時爲陳覽以自怡春秋佳日則與二
三同輩觴咏流連杜門不與外事

賀承字克欽工詩刻歷朝詩選

葛筠號湘湄明諸生康熙乙卯舉人任長洲縣教諭少

與冷秋江齊名所著或謂其豪氣未除然詩工樂府
文長書記亦一代作手也

虞渡字原博號巨楮布衣玉之子性靈敏博學於書史
無所不通詩文皆涉古大家堂奧甯都魏和公深與
友善

湯寅字谷賓號漁客文生幼穎異讀書日十行下過輒
不忘工詩古文詞厭棄舉子業高自位置於人不輕
許可當時推爲一代作手與吳梅村陳其年邵子湘
輩齊名一日至京口訪友回晨起憑几而逝逝之日
有見之市中徐步向西北行揚揚如平時過其門聞
已卒乃共歎爲仙去

賀宿字天士號客星附貢生與天山國璘皆以古文名
詩尤工時稱二賀少寓毘陵同鄒訐士陳椒峯結詩
文社入都後爲王北山給諫所重欲薦宿博學鴻詞
適有貴顯以文投之宿於其前摘其謬因中以他事
繫獄旋遇赦出都道聞北山訐號哭委頓遂致疾卒
於客邸吳庶子珂鳴經紀其喪以歸

葛千秋字龍文號古香抗爽多才下筆千言立就嘗著
其祖蒼公麟外祖吳峴山中奇傳自題七十三年紀
事詩才情橫溢足以發抒忠義之氣

重刊陽縣志 卷之二十三
姜朝勳字廣成號克庵康熙庚辰進士授陝西甘泉縣
置社倉減浮丁講學課士有德於民內擢吏部文選
司主事典試雲南途中有鐵索橋關索嶺清溪洞飛
雲崖等咏模山範水人以為不減陸放翁入蜀集有
使滇漫草李安溪序刊行世祀甘泉名宦

荆德珩字南華號徐江康熙丁酉舉人詩才澹逸尤酷
好陶徵士詩嘗集陶詩成帙純乎化工如自己出

東昌霖字聚五號五峯康熙辛丑恩貢生天才奔放
工詩古文辭古文得力於司馬子長當時如宜興六
儲金沙六王皆折節下之

馬玉堂字子振少有神童之目年十一補弟子員同時
馬宜陸字景儀八歲工詩文名噪吳下年十三補弟
子員宜陸有集行世

虞文璇字政衡太學生工詩文熟於吏治幕遊足跡遍
天下善丹青絲竹臨池篆刻諸技而長桑之術尤有
飲池見垣之奇

楊敏求字南山邑增生有文名乾隆十五年修志後其
裔孫城曾邀同邑人呈請入文苑

荆摺字慈衛號盟石布衣博極羣書長於傳記書法尤
冠一時婁東陸世儀云顧學士奉命纂修子史精

華延摺總其綱

張雋字嗣音年六十始食餼深於史漢散行文與魏叔子禧方望溪苞抗行制藝亦高古不中有司繩尺終以不遇門人湯登泗梓其遺稿金沙王步青爲之序丁鼎時字九疇號柯亭廩貢生文名噪一時爲吳祭酒偉業所賞識又與魏禧陳維嵩汪琬姜宸英同邑湯寅賀寬爲友有文在之選著有新硯驪珠等集

湯諧字展文號懷村初名大成性穎異讀書過目成誦八歲應縣試第一嘗以事繫獄於獄中上書學使者事得白尋領雍正甲辰鄉薦計偕赴都病歿客邸古

文與江西李穆堂齊名著有練湖歌敘錄史記集解行世

睦朝棟字堯章乾隆壬戌進士授庶吉士改主事累遷郎中擢監察御史督學黔中黔人初不習音韻朝棟著詩韻六冊教之由是始知字學以科場迴避事罷歸乙酉召用授沅州府知府擢衡永郴桂道有惠政衡永人建祠祀之朝棟工古文青浦王昶採入湖海文傳

吉夢賚字迺振好古績學江左推爲宿儒乾隆甲子副榜官黟縣教諭歷主亳州汝甯上蔡蕪湖諸書院弟

夢熊夢蘭皆師事之夢熊自有傳夢蘭字會亭乾隆丁丑進士以庶吉士派習國書未及三月輒能剖析音訓洞曉文義旋卒同年王昶爲之誌墓比之劉眞長裴叔則云

荆行舉字雅南邑文生著有題名臣言行錄詩七絕百首詠明史樂府六十首載曲阿詩綜

陳天詔字龍章附貢生嘗構小有天書屋吟咏其中所著詩沈歸愚爲之序

彭澧原名澤令字晉函號莪園乾隆癸酉拔貢丙子順天舉人以古文鳴於時青浦王述庵侍郎恆與馳書

論古又爲王己山太史所推重嘗在京師與朱孝純王文治姚姬傳結詩社名噪一時文治自序其集云晉函齒倍於余余詩多所刪正其折服如此晚應貴州學政同里睦朝棟之聘客死黔中

吉彥英字幼華乾隆乙酉拔貢選安徽太平縣教諭擢廣西城步縣知縣左遷湖南武陵丞旋知城步縣所至以著書爲事已刊者十舍集射稽草抱遺集字說十餘種未刊者尙多今皆不存

於震字亦川號秋水武生工詩古文辭乾隆乙酉南巡召試考列二等震性情豪邁人以此比徐文長所

作詩骨力開張格調洪亮能窺明七子堂奧爲袁子才太史所賞採入隨園詩話後客死泰州宮惺持題曰丹陽詩人於震之墓

姜令誼字舒箴乾隆辛卯舉人以古文見知於彭尙書元瑞

劉奎年字藻初乾隆甲午舉人歷知直隸清平沙河安平縣奎年腹笥紛綸才鋒迅發工詩古文詞少時讀書京口與張海帆鮑海門相唱和中歲歷游燕趙齊楚所詣益進繼至京師爲王偉人董蔗林兩相國所器重居官所至亦俱有治績可稱

顏熒字鶴照號暮樵乾隆丁酉拔貢生老於經師學問淵博詩刻曲阿詩綜亦俊逸拔俗惜遺稿散佚

荆汝翼字廷緯號桐軒乾隆己酉進士官華亭教諭文名傾動江左陽湖洪亮吉嘗從之遊在京師時一時名士如趙鹿泉祝芷塘馮魚山顧星橋皆折節與交冷昶字煥如號泉亭布衣寄情山水翛然塵壒之表所著詩丹徒鮑海門之鍾序以問世

呂斌字惺園貢生乾隆甲辰南巡召試河源賦書學顏魯公亦能神似

陸炳字赤南布衣幕遊湘蜀精於經學並以詩名與查

恂叔觀察顧東山臬使爲文字交選入 國朝詩鐸
吉士瑛字伯英嘉慶壬戌進士改庶吉士甲子 駕幸
翰林院士瑛侍宴賦詩蒙 賜御製味餘書屋全集
端硯玉杯各一是冬充詞林典故協修官散館授山
東新城縣知縣調冠縣所至能以經術飾吏治詩有
宗法書學顏魯公頗得其骨力
東南薰字虔琴附貢生所作詩皆關係時事選入 國
朝詩鐸

姜景華字湘浦邑諸生自幼好爲詩古文辭購書數千
卷寢饋其中隨父宦楚南時耆儒羅典主講嶽麓書

院提倡風雅景華從之遊詣益進劬學早卒續 國
朝詞綜及曲阿詩綜詞綜採錄其詩詞

劉會恩號時庵嘉慶丁卯副貢留心邑中文獻歲庚午
河帥黎世序時官鎮江府知府纂輯練湖志延會恩
分校選曲阿詩綜三十二卷詞綜四卷行世

周玉瓚字西賡道光丁酉舉人歷知河南正陽洧川縣
少家貧篝鐙自課雖酷暑不輟舌耕三十餘載晚年
始領鄉薦大江南北知名士皆從之遊工詩古文辭
淵懿博雅生平涉獵羣書於淵鑑類函尤爲精熟隨
舉一條記誦不遺一字有雅存堂稿傳世

黃之晉字少鐵晚號鐵禪居呂城鎮道光甲辰進士歷官江西彭澤新喻南豐令擢建昌同知性穎悟讀書日數行下詩古文辭奧博奇肆無一字無來歷家貧苦藏書不多通籍後購書萬餘卷繙閱一過皆能得其要領咸豐中罷官歷主書院講席江右人奉爲圭臬有才子之稱所著秋水齋詩集經學十餘種具有根底歿於贛州傳者卒鮮

魏莖字樹人邑增生生平以詩酒自娛胸無俗事著有紅薇吟社詩草選入國朝詩鐸

楊嘉樹字青谷邑廩生天才敏捷遇事有義俠氣與里人荆少梧履吉林厚卿植本共結吟社詩特豪宕勝處直逼杜陵同社如虞紫崖攀桂劉樸齋守中蔣芍農圻每逢春秋佳日酒醞花香分箋角藝在嘉道間極一時人文之盛其集已刻未刻今皆鮮存

丹陽縣志卷二十一

忠節

反正建猷賢王隕命汴都告急烈士極言唐之桓彥
 範宋之陳東炳然與日月爭光已勝國遺民奮其螳
 臂輒敢當車何其決也頃遭粵寇諸生死事者數十
 百人其他從容就義身膏原野者不可勝計正氣之
 塞天地固如是夫志忠節第十九

齊

蕭子隆字雲興武帝第八子性和美有文才為都督荆
 州刺史歷侍中中軍大將軍明帝輔政謀害諸王子



重刊陽縣志 卷之三
隆乃心王室被殺

梁

蕭綸字世調武帝第六子聰穎博學尤工尺牘爲郢州刺史侯景搆逆加征討大都督率眾討景敗還屯汝南爲魏將楊忠所破不屈被殺

蕭推字智進安成王秀第二子少清敏好屬文深爲簡文帝所賞封南鄉侯歷淮南晉陵吳郡太守侯景之亂守東府城陷死之

蕭深藻官征東將軍南徐州刺史侯景亂遣長子彧率兵入援景據京口或勸奔江北深藻曰吾國之股肱不能誅賊當同死朝廷遂不食死

唐

桓彥範

事見名臣

宋

徐芳字孔茂紹興時揚州統制李全反攻揚州芳與趙范等出擊之殺傷甚眾芳深入遇害軍士感其德立祠焦山

郭忠孝字立之號兼山爲宋理學名儒暨子雍著大易粹言傳世任河東路提舉靖康末殉難永興軍贈太中大夫祀忠孝祠

陳東

事見名臣

諸葛夢宇字芝宇號桐庵鑑之子咸淳十年進士從駕
海濱官參知政事僉書樞密院事祥興乙卯少帝崩
遂自縊

明

賀純字仲賢雄健有將略太祖起淮甸丹陽尹白謙舉
純萬戶府百戶積功授承信校尉世襲管軍百戶靖
難兵入時純已老聞變起被甲策馬往金川門厲聲
迎詬被害子庸復以功陞鎮海衛副千戶庸子哲永
樂中改潞州藩陽中護衛左所千戶子孫世襲

彭理字僚友世襲指揮僉事建文時官北平都指揮使

命監燕邸靖難兵起盡節端禮門

賀應選字繼登天啓甲子舉於鄉崇禎癸未授資陽令
時蜀已多事獨留長子家居日脫事不可爲當死俱
死無益也親知皆泣送之至蜀郡邑多殘破倉皇入
資陽守具未備獻賊已薄城下城陷被執賊劔擬之
曰若何欲張目叱曰欲死賊笑曰若欲速死耶囚別
營月餘復牽之入意將屈服之應選怒曰狗屠乃望
降我爲鬼尙殺賊況人乎賊亂及斫之一門十七口
俱被害子雲舉順治辛卯恩貢知絳縣謫兩浙鹽幕

時四川初定棄官入蜀求遺骸弗得聞者悲之

賀嗣隆字明先諸生有志略會中原寇亂思陵破格用人詔在京五品以上舉堪爲守令者一人樞曹賀鼎以嗣隆名上授清河令及至官卽以書告鼎曰是不可爲也吾必死於此矣已而賊至城惡不能守遂力戰死

張捷字前之萬歷癸丑進士知山陰縣有惠政擢監察御史歷吏部右侍郎公廉不受請謁南都建進吏部尙書乙酉城破與僕之雞鳴寺僕泣視其自經遂祝髮雞鳴寺爲僧以終

葛麟字蒼公號瞿庵年十一與羣兒嬉據上座分什伍部署之演奇門於庭有矜力引弓矢輒中居父母喪廬墓以忠孝自勵作孝烏賦山犬賦以見志年二十九爲諸生時鎮江守印司奇賢而獲譴麟走京師擊登聞鼓直其冤尋又叩闕請誅督師楊嗣昌以安天下崇禎壬午與宜興盧象觀同舉於鄉請以淮撫史可法督諸鎮師旣李自成陷京師麟草檄糾義旅南都建七上封事又請練兵江北皆不報可法遺書目爲岳忠武一流人物巡撫祁彪佳巡按王孫蕃交章薦授中書舍人時鎮將于永綬駐鎮江城外橫甚麟

借吳中奇登陴砲擊之以疏斥馬阮奸佞當事毒麟甚將解散所練兵乙酉南都不守與鄭鴻逵協守京口京口破走海上同總兵吳志葵起兵攻復青浦志葵見擒潰卒推麟為帥時郎中王期昇奉通城王盛激立塞太湖之西岡與之合未幾盧象觀亦至軍遂盛期昇兵剽掠民苦之導大兵焚其舟期昇遁象觀危甚麟望見火光率三舟衝之所當披靡大兵耳其名諫曰長而肥者葛中書也萬箭注之麟揮矛如風箭悉墮水乃更以火攻舟焚自沈死湖湖之象小嶼山象觀拜其眾曰我兄弟受國恩昇兄弟象無以報空累公等

死有餘愧躍入水死麟弟敏先鋒毛重泰陳坦公皆死之祀忠孝祠文生葛景字日升慷慨負氣節參盧象觀軍事亦同殉焉

荆本澈字濂之一字大澈諸生慷慨有大志督學熊廷弼以傑士目之甲子舉於鄉崇禎甲戌成進士忤烏程相抑為建昌府推官所屬南豐瀘溪二令為烏程私人發其陰事罷之烏程恨刺骨以浮躁免官歸時天下多事大澈解任歸散財結客招致北地材勇曰有急當共起抵掌談兵事窮日夜不倦及烏程罷臺省交章薦之以職方司郎中監下江軍命甫下闖賊

破京師大行訃至大澈大慟嚙血草檄徵兵勤王縞
素誓師悉起平昔所養士自當一隊爲江南保障會
左良玉兵從湖廣東下閣部史可法督漕淮上謀於
大澈折東馳辨曉以大義左鎮遂斂軍歸時江北潰
兵亂流而渡承天總兵劉肇基于永綬焚掠潤西門
外大澈陳兵諭以禍福相次引去南中相忌其才嗾
科臣陸朗誣奏與舊輔姜日廣謀立疏藩禍至不測
史可法劉澤清揭救得免加兵備道仍監下江軍乙
酉南都不守大澈孤軍莫繼退保浙東與田仰等奉
義陽王駐崇明沙兵敗入海屯舟山之小沙壘其將

士善射總兵黃斌卿忌之夜襲澈營遂被害兄本源
二子沐溱皆死之溱妻于氏從夫死尤烈

賀王盛號無黨世壽子以進士歷官縣令內擢兵部主
事轉太僕寺少卿嘗抗疏論閣臣溫體仁閹臣王坤
直聲震天下旋奉命巡視海道爲濟漕計未復命莊
烈帝已殉社稷乙酉南都不守故相黃道周奉永歷
監國召爲兵部侍郎未及赴事發不屈死自題絕命
詞云悲歌慷慨說天祥浩氣凌虛返帝鄉從此十人
離紫禁相隨地下拜高皇時同殉者十人也

賀向峻字葵忱邑諸生甲申燕都失守聞思廟殉國痛

哭喀血數升乙酉五月南都繼陷峻與故人汪參去
之大不山聚義士千人襲金壇破之為主兵者畫策
不聽兵敗被執不屈死時葛麟弟章明與同邑荆碩
起兵於金壇之遊塘廟皆死之

眭明永字嵩年號懷蓀崇禎壬午舉人官華亭縣教諭
與諸生講學勵行務明大義乙酉大兵至松江明

永知天命有屬偕妻李氏同縊明倫堂

按明史沈猶龍傳載華亭

教諭眭明永題詩

明倫堂投縊死時倉卒赴義夫婦失序明永驚覺

卒正位而逝衣襟中題絕命詞云明命不永嵩祝何
年生忝祖父死希聖賢同時從死者門斗三人諸生

亦多就死於家子本字古農邑文生永歷監國與賀
王盛同被召事發題絕命詞死之

眭明黻字君辨任應天府守備乙酉南京城破死之

冷懋炎字我榮宏光時守備隸揚州史閣部麾下乙酉
城破戰死閣門俱殉難乾隆間邀恩卹得世襲

王介休閒莊烈帝殉國不食七日死

汪參字中子新安人入籍丹陽為諸生故翰林周鍾門
下士也流寇入都參和藥進曰先生負盛名義當死
幸早自裁參終不負先生他日相從地下耳鍾曰唯
唯參度其無意引決乞食南歸奉湖中某宗室號令

引兵拔金壇湖中兵敗參不知所之越數日大軍出
丹陽有白衣冠少年率壯士百餘人逆戰死路側識
之者曰此汪中子也

國朝

於汝金字麗生丹陽人寓居揚州咸豐辛亥 恩貢生
候選直隸州州判性伉直遇事不苟癸丑粵賊犯揚
郡汝金預團練事城陷被執大罵不屈賊怒刃交下
罵益厲一賊從旁刺其腹遂仆地血泔泔衣裾皆赤
猶罵不絕口子候選從九品學端隨母涂氏率家屬
匿鄰舍偵知父被賊狀急歸見父創甚痛哭以布一

一蒙創處未竟而汝金死矣學端殮以書櫬遂不食
死涂氏及其嫂林氏朱氏女次姑長子婦朱氏妾陳
氏次子婦朱氏三子妾劉氏四子婦朱氏孫師頤恆
女孫順姑大姑三姑皆絕粒死出嗣姪南河候選未
人流杜以接應官兵攻城爲賊所殺一家死難者十
八人事

聞先後得

旨汝金照四品官以下傷亡例

給雲騎尉世職學端

贈鹽運使知事銜並廕一子以主簿候銓杜照陣亡例

議卹

給雲騎尉世職襲次完時給予恩騎尉罔替餘蒙

恩卹

旌卹如例附祀揚州昭忠節烈祠並准捐資建祠

姜應揆字熙載歲貢生候選訓導咸豐十年大營退守丹陽其友趙廷璧謂之曰如賊至君何以處之應揆曰臨大節而不可奪吾志決矣廷璧曰是我心也兩人遂相約死難未幾城陷應揆至明倫堂自經子榮福榮詔同死於傍趙廷璧與其妻顏氏女大姑二姑三姑四姑及婢丫鬟闔門自焚死

荆履吉增生候選布政司理問嗜古博學著述甚富十年四月朔賊至以所著詩文集束其身曰吾以此爲殉裔降不屈死子熙耀亦遇害

被害

魏純字樸甫附貢生賊至索金詭言取金匿其父而出
賀朝棟諸生敦品力學爲鄉里所推重咸豐三年府城陷朝棟授徒邑之貢村其地爲往來要道遂倡捐團練且戰且守屹然爲西北鄉保障焉六月賊下竄屢擊之輒有斬馘賊不敢輕犯丹陽者甚朝棟故也十年三月賊由金陵下竄朝棟三戰三捷擣其營獲大

重刊陽縣志 卷之三十三
礮四其餘器仗無算及城陷老母被害朝棟灑泣誓
師眾皆出死力苦戰賊不得志乃糾集僞英王剽悍
之黨號十餘萬六月五日黎明猝至時朝棟軍已募
食從父賀鳳舉所領團兵未至弟朝華朝衡江圩之
團反爲賊所隔不能相顧遂倉皇出戰至日中死傷
過半朝棟陷陣中傷墜馬而死鳳舉朝華朝衡皆歿
於陣

林佩金字礪齋諸生爲人軀幹傀岸性豪飲里中有不
平事輒侃侃論斷不肯少阿聞賊入城急詣酒家浮
一大白遇賊怒罵被亂刀砍死妻王氏子婦華氏幼

子秀狗孫一女孫一皆死焉長子秀文爲賊所虜逼
應僞試秀文白日見其父戟手唾罵遂暈絕從賊中
逃出者目繫其狀如此

張淦諸生年七十九十年閏三月城陷被執不從奪賊
刀自剄其弟景植景棟年亦七十餘見淦死皆罵賊
不屈遂被害子承勳承熾曰吾父死矣吾叔父又死
矣何忍獨生皆慷慨罵賊而死人謂父子兄弟視死
如歸忠義之氣萃於一門

景澍椿諸生有至性曾割股愈父疾同治元年二月十
五日與弟澍楠被虜至金壇東門外投於水賊退人

援之起澍椿以指畫九字於水灘云生不入賊中死亦無恨遂卒

邵燮諸生賊至脅降燮罵曰吾豈爲若等作賊乎賊及之罵不絕口而死時年七十有九

陸斌有勇力軍興督帶練勇以勞績保舉五品銜城陷從知縣方濬泰與賊巷戰猶殺賊數人力竭遇害同時巷戰死者賀俊心劉汝濟等皆著於表
劉榮瑞職員寄居金壇城與司事吳秉禮守城被圍數月晝夜堵禦及城陷歸家大哭命家人各自爲計遂服鹵汁而死妻魏氏亦服之未死賊至中鎗死

鍾嶽英監生性孝友聞賊至時兄岱英病篤不能行遣弟岫英奉母逃難已侍兄不去兄命之行嶽英涕泣不從四月五日賊至被害

魏錫綬監生居三板橋城破前一日命長子伯和挈妻子遠避明日城陷促幼子出以薪塞其門與妻湯氏自燔死伯和逃至江北棄妻子渡江尋幼弟知父母已死行乞至丹陽充役夫入城潛負其父母骸骨而出

王煥若監生賊至與妻黃氏罵賊不止同遇害煥若年八十二黃氏年八十四同時奉祀生劉廷燕聞城陷

重刊九原縣志 卷之三 十一
恐死於賊手積薪自焚死年亦八十二

姜金簡文童城陷奉母逃難遇賊於途以槍刺其母金簡以身蔽之中臂血出扶母行復遇賊刺其脇血湧仆地泣謂母曰兒不得事母矣投水死

錢錦榮賈人也粗通文義喜讀書尤熟於史事談古今忠孝輒頓足起舞或唏噓泣下至於奸回誤國則拍案大罵目皆盡裂勉人爲善意尤懇至城陷日呼弟錦寶曰吾輩食毛踐土久荷高厚之恩臨難苟免何以爲人遂與錦寶及繼妻夏氏錦寶之妻張氏寡媳丁氏幼子椿整衣環坐一室積薪自焚死同時職員蔡之孚一家十三口亦閣門自焚焉

潘秀揚城陷率其子與賊大戰於葛莊父子皆陣亡從死者百餘人

裴嘉柏妻錢氏聞賊將至夫婦相謂曰與其死於賊不若自盡之爲得也從容攜手入井而死

李瑞年丹徒人寄居丹陽之包家庵十年四月七日賊至瑞年禦之賊圍之數重瑞年手及二賊突圍而出八日奉父避山中賊入山父投於水瑞年遇害於山麓

丹陽縣志卷二十二

孝友

虞書曰克諧以孝君陳曰惟孝友于兄弟孝自無不友不友亦不得為孝也刲股殘身儒者弗道然愚夫愚婦耳習舊聞發於至性九死弗顧何可沒也志孝友第二

齊

蕭叡明字景霽累仕安西中兵參軍松滋令母病風積年沈臥叡明竭誠躬禱叩頭出血時嚴寒淚為之冰忽有一人以小石函授之曰此療夫人病叡明跪受



之忽不見函中惟有三寸絹書日月字母服之卽平復後母亡不勝哀而卒永明五年贈中書郎

隋

蕭世廉摩訶子也警俊勇敢有父風性至孝摩訶凶終時世廉方幼服闋後追慕彌切其父時賓故脫有言及世廉對之哀慟不自勝終身不執刀斧

宋

蘇攜字季升頌之季子頌自濠赴御史臺對陳世儒獄攜年十二隨至京師僦舍御史府前朝夕入問起居狀問詣宰相府訴冤事由是得白攜亦以此知名

蔡淵字子雍登熙甯進士乙科累官至太宗正丞初淵家饒於財兄弟以豪奢相尚淵獨擔簞以遊寒苦如窶人或勸稍分兄弟之財以自給曰兄弟治產吾治書兄弟不以家事累吾吾可以身計累兄弟乎聞者愧之

葛書思字進叔熙寧六年進士官朝奉郎調建德主簿有惠政時父密已老欲迎之官父難之書思曰曾子不肯一日去親側豈以五斗移素志哉遂投劾歸養卒諡清孝

劉嗣慶字繼先其先自涿州徙丹陽又徙金壇弟蒙慶

重刊丹陽縣志 卷之三十三 二
字茂先兄弟齊名友愛尤篤皆以文行稱嗣慶病且死語弟曰吾宗世葬丹陽而父母葬金壇吾與汝分處之卒附先祖墓蒙慶葬金壇方山嗣慶自號雲茅居士以身在雲陽茅山間也子宰自有傳

諸葛墳父鎡字大本篤於孝友墳執親喪哀毀絕酒食問喪於劉宰鮮違禮焉手治墓劬瘁骨立歲饑民共伐墓木墳不能拒抱木泣痛而卒人稱諸葛孝子云東崇芳字德馨德祐乙亥北兵來父國寶被俘崇芳詣軍門號呼請代父大帥義之釋國寶去留崇芳軍中掌文檄久之憫其孝言於伯顏予以二矢縱歸子二

人觀壽泰壽最知名泰壽杭州路儒學正兄弟置義田闢義塾以教養族黨邑人稱之

元

張壽字仁輔五世同居孝友彌篤至元三年詔旌其門曰張氏德義之門

貢文寶字賢甫號芝逸與弟文虎文豹友愛篤至顏所居之室曰友于

孫毅字仲剛篤於行誼兄弟同居不分至毅凡七世聚族而食者指以千計有司欲言於朝辭曰吾族眾且貧聊相聚爲生耳非有德可稱也固辭不受後值元

季之亂叛者四起有欲脅之相從者毅拒之日吾家世守禮法豈效汝曹所爲哉叛者義而釋之

孫思濟號觀瀾孝友性成父良三病痢危甚效黔婁嘗穢以驗其瘥劇居喪哀毀幾至滅性撫諸弟友愛特至其文藻翰墨尤冠當時元末屢承薦辟辭疾不赴闕映雪書院於江渚一時名士多與之遊

明

賀懋孝字日純性至孝父歿廬墓三年免喪而哀未忘族中舊有軍籍舉族以均貼爲苦孝獨捐田以給費天啓四年旌表

孫沐字志新號曲水八歲舉神童弱冠補國學生以母嫠居孝養三十年隱居不仕一時名士皆高其行而樂與交同學生奉新鄧廷相貸百金相死以券歸其孤歲賜卹之邑令來汝賢義之因修麥舟橋書其事於石

荆本完字冲之邑廩生萬厯辛丑隨父光祚粵東廉州照磨任廉郡濱海有寇警郡僚咸缺值光祚疾本完代籌防禦兼親湯藥不交睫不解帶者五月迨郡獲安堵父有起色而本完以勞瘁卒次子廷鈺崇禎戊辰進士官始興令奏父孝節奉旨旌表贈如子官

賀恆字久中父江西德興丞內陞司城未赴而江右大亂恆獨身往尋遂死亂兵中不返妻于氏守節四十年

賀汝第字合虛王盛子以父殉國難出家為僧

荆象衡字南瞻父偉殉難墊江縣象衡奔喪往返數千里時猺寇充斥象衡不避艱險負父骨以歸

諸葛長科字復初性至孝父元表疾割股以進父卒廬墓三年有靈芝產其室白雁集其庭侍御史饒京疏於朝建坊旌表

夏時字行之割股救親崇禎朝得旌典 國朝順治時

復表其門

朱國寶字應嘉隆慶時土寇竊發突有賊劫其父去國寶冒刃救之與賊格鬪身受重創卒奪其父還事聞於上賜銀帛並旌其閭曰孝行之門

荆文瑞字肅之嘗官鴻臚輒去職家居以孝弟聞先人資產推其上腴以與二弟仲蚤亡子幼成就之訖於舉進士文瑞輕財好施見孤嫠窮餓者傾囊橐毀質劑無幾微德色以子廷實貴贈兵部主事

國朝

孫從義字仲醇幼孤事母至孝當就試以母老不赴隱

居課耕以供菽水性亢直好善樂施恂恂不倦以子
允恭封兵部郎中

湯道立字爾卓事親孝家貧授徒養親親老臥不起必
手進湯藥或時穢枕席皆躬自浣濯居喪哀毀踰禮
得疾卒道立於書無所不窺尤粹於五經爲諸生五
十年未嘗一識府縣廳事

賀上林父天敘以事忤毘陵令繫獄將殺之上林年甫
十八謀脫父弗得聞巡撫將至涉江湖淮迎其舟大
呼騶從呵之不得前遂投河髮沒數寸復躍起大呼
撫軍急令救之已死檢其相衣得一紙則白父冤詞

也撫軍按毘陵具得令不法狀釋天敘獄毘陵人立
賀孝子祠祀之

黃洪元父國相與同里虞庠有隙庠陰伺國相夜醉沈
之河時洪元甫十餘歲與弟奇元日夜飲泣各市鐵
鑄一斧夜則磨之數年未得間一日鄉里舉社會庠
至洪元奇元揮斧斧庠血月狼籍眾皆辟易詣官自
陳兄弟爭死有司義之釋奇元繫洪元於獄康熙辛
亥事聞 詔釋之遂爲僧

張炳祖字虎文從父仲馨北遊抵濟上父病熱不汗炳
祖夜告天割股月進卽大汗熱解復糜月雜粉糕以

進不十日愈父先病痢四十日臥起抱持漸不能興以牀為厠皆親裹滌復負重創積勞成瘵二年卒

荆孝錫字龍媒康熙己未進士性純孝母疾侍湯藥不解衣帶者半載值歲旱奮然日願活千人祈活吾母

然家貧多方典貸獲穀五百石饑民賴升斗以生者數千人登第後以父年老不願就仕承歡養志人無

間言

賀理昭字孟循號著軒太學生襁褓中父向竣以諸生

殉國難母史氏矢節撫孤十歲從叔父國璘受經穎

悟異常母泣日兒父慘死但得勉讀父書使天下知

其父有孤幸矣功名非所望也理昭奉母教終身不

敢違

楊申錫有至性生甫周而父亡每逢忌辰哀慟之容屢

日不解母稍不如意即跪請俟母悅方起母素羸一

日疾篤延醫皆云不治申錫日夜號泣籲天求代忽

夢一老人以甘露飲其母病遂瘥母父邱卿貧無子

母欲為立後邱姓無願者申錫仰體母志給田十畝

為立後母歿哀毀骨立廬墓三年學院李振裕表其

門

睦永昌父貞遇疾篤糜股月以進父遂愈巡撫慕天顏

旌其門

葛任義字用伏善體親志父孟育性喜交遊任義於父執款留晉接備極誠至親友時有緩急不待父命卽預備以俟常於父臥榻下置錢十數貫間日一往視若少去必補足其數知縣馬光裕旌其門康熙四十八九年修文廟明倫堂開設育嬰堂時孟育已前卒任義曰此吾父志也

賀汝繩字其年邑庠生至性孝友康熙甲戌劇盜斧門入劫汝繩父利及相逼汝繩直前捍盜首受二斧死而復甦者再半載始愈年屆六十猶依依孺慕云

史學書郡庠生性孝友家貧授徒養親冬溫夏清備極孝敬

張發祖字孝舒康熙壬子舉人歷任句容和州淮安學博擢濬縣令潔己惠下不尙刑威士民愛之旋以母老乞歸養忽一日嗚咽語母曰兒不孝不克終養吾母罔極之報期以來生時母年踰九十發祖亦七十餘未嘗寢疾而卒

湯綏字申錫康熙丙申父疾劇剜股以進父夢神語曰汝數已終嘉汝子孝增算二年遂愈雍正甲寅母張又病復剜股進之母竟歿

豐停敏字翁耕邑庠生家貧孝事繼母甘旨必備後頗
饒撫兄孫東山爲完娶盡復其祖父所棄產以畀之
宦允康字佐釗篤於古道兄嫂長姪相繼歿撫其幼孤
二十餘年教養婚娶悉以所遺產並所增置還之內
親某客死楚地捐金取贖其子

姜璽字璧如滕村人居尙書寶故宅樓高壁堅惟南向
一門通出入壁如父殯其西北隅歲庚戌火從戶側
積薪起風猛焰烈救者不得入樓居者墜而下藉援
接以免璽館二里外聞變踉蹌歸大呼曰母安在曰
出矣柩安在曰未出也號呼冒火入眾惶遽百計求

所以出之力攻後樓壁壁稍洞遙見璽繞棺走火及
棺輒以身遮護之眾大譁壁亦大潰蠶擁入救棺得
無恙而璽已焦灼死矣年二十有一督學湯金釗手
書哀辭並序以弔之

吉大來字孟宣與仲弟同遊於庠季弟大昇儒而兼醫
一門友愛宗黨無間言家故寒仲弟病篤醫言當服
人參大來與季弟出平時所積束修市三兩以進後
仲弟夫婦俱歿遺孤方三歲大來撫之如己子教以
儒業籍其遺貲代爲生息及孤子成立乃舉所存悉
付之

重刊陽明縣志 卷之三十三 九
吉曦曜字煥文兄弟三人伯兄居外久與仲兄曦朗同
處遭回祿者再窘甚棄舉子業偕仲兄治生以供菽
水家漸裕事父大兆嗣父大祥能得其歡心後以子
夢熊貴贈如其官

錢邦寅字馭少丹徒文生移居邑之延陵學問淵博天
性孝友因兄開少出遊閩粵不返遂棄去諸生以著
書爲事每登高望遠輒思其兄悲歌痛哭年七十卒
門人私諡曰介節先生

葛錫成字禹功邑文生寓居毘陵性至孝早喪母哀毀
不欲生每以菽水未奉爲恨

姜令訪字箕陳乾隆庚寅舉人任霍邱縣教諭有兄弟
爭產因訟發學者適令訪之兄令誼亦在署白頭兄
弟與兩生同處一齋日則共案而食夜則對榻而眠
兩生親炙久之忽相持而泣謂學師老年兄弟猶且
友愛如此吾儕將何以爲人遂各願讓產息訟

魏晉輝字協和太學生四庫館膳錄候選按察司經歷
以子駿猷貴贈奉直大夫晉輝生有至性成童便能
先意承志得堂上歡母氏張病篤刲股入藥病尋瘥
爲人精敏仗義好施倡修 文廟南薰尹公等橋鳴
鳳書院湖心亭勸捐開濬城河立施棺水龍諸善局

至今邑中猶稱道之

林肇基字翠岩天性孝友年未冠父越凡入都充宗人府供事久不歸肇基徒步往省越歲復入都迎父歸先意承歡色養交盡弟肇庠以事羈武都階州乾隆丁未戊申兩次尋弟跋涉四千餘里弟無歸志肇基念親老不敢久留返至瓜步時十月天將曙板橋霜滑水流聲澎湃所乘驟驚蹶落水由是感寒致疾遂不起

楊茂本太學生性至孝待母病兩月餘力竭計窮至效黔婁之所爲以辨瘡劇

程元德以成衣爲業嘗從父之鎮江觀賽會河干擁擠父失足墮水中元德赴水救之越日兩屍相抱立水中丹徒紳士顧復祖應讓等立石死所曰丹陽孝子程元德赴水處

王錫勛長慶村人與父景湘同爲諸生景湘誤傷工人戍陝西之潼關錫勛送父往戍所歲一往省至赦歸而後已

吳文壇世居豐洛村幼時父坐事戍邊及長思父徒步尋至戍所留數月念母又切遂歸旣父復從蘭州改戍巴蜀欲再往視而凶耗至因變產得金留三之一

重刊陽明縣志 卷之三
安母賚其二以行覓得遺骨父所稱貸人者盡償之
資斧不足並日而食行七千里歸不逾月皆以爲天
相也

諸葛華有至性生平誦孝經不輟母氏張患病委頓禱
於社神剖股和羹以進病遂瘥

貢培棟字觀揚母徐早世與父紹禮同臥起者數十載
父歿廬墓三年道光戊子學使朱方增旌其門

劉爲民六歲母杜氏亡父慶祿繼娶謝氏生一子二女
父歿每夕往墓所伴父事繼母孝撫育弟妹極其友
愛咸豐庚申粵匪陷城棄妻子獨負母逃鄉人皆稱

其孝同治壬申知縣張旌其門

於永達家貧業農性至孝咸豐庚申之亂母羅氏遇害
負屍歸葬哀號不避鋒刃父印廣年逾六旬精神衰
弱供膳惟父所欲每晨侍立牀下代著衣履三五日
必挽小車載父遊村市以適其志同治壬申知縣張
旌其門

李錫璠木工也父病衣不解帶者累月閱十餘年母復
病劇醫云不治璠禱於神願減己年益母因潛剖臂
月和藥以進母服之漸痊後鄰舍兩遭回祿焚至璠
屋卽止人以爲孝感所致光緒元年縣令徐旌其門

丁龍標太學生性友愛與弟龍光姪士瑛姪孫文生敏同居三世無間言龍標孫太學生敦姪嘉坤姪孫佩珍姪曾孫永康六世合爨邑中皆推爲義門知縣劉誥旌其門

袁曦字鑑寰生有至性事親孝母病曦年幼無兄弟徬徨不知所爲中夜入密室剜股月和藥以進母尋愈時年十二

張葆真文生性純孝幼喪母哀毀如成人父卒痛不欲生旣葬臥墓側七日夜繼母卒臥墓側哭泣如喪父時

裴悅字福如母疾刲股療之母愈父患痢斷一指和藥進父病已咸豐庚申城陷遇賊不屈死
盛範先生有至性父榮睂以醫出游年久不歸範先年十三念之至廢寢食一日謂兄曰天下烏有有子三人而聽其父飄零異域耶兩兄可謹事老母弟將走徧天下與父同歸也於是之浙之閩之楚乞食三年而竟與父俱歸

姜國棟母霍氏疾刲股和藥以進疾遂愈

姜寅岳生母丁氏病割股煎汁進之母遂愈

諸葛華文生生母病刲股進尋愈

汪海龍農家子也家貧隨兄傭工奉母兄嫂亡遺兩姪
海龍年過三十乃娶妻母年八十餘病癱舉動需人
海龍皆親任之咸豐十年匪入境海龍負母逃賊感
其孝釋之明年賊大至海龍被執已而逃母餓死數
日矣

彭振金文生事親孝咸豐十年粵匪入境負父逃避中
途父邁疾倉卒無醫藥割臂療之遂愈

王乾瑾監生父病禱北斗求代尋愈母病割股和藥以
進病良已承父志置產助恤嫠會道光己酉庚戌邑
大水族中多賴存活咸豐丙辰旱傾囊倡賑全活無
算卒年四十歲

景澍椿文生道光壬寅父聚璜疾澍椿割股進尋愈
汪毓林兄弟三人長復清次毓炳林其季也嘗從伯兄
讀事之尤謹咸豐十年賊至兄有疾揮林挈妻子逃
林曰死生命也偕一子扶兄行賊至兄被擄林謂賊
曰吾壯而兄病盍易之兄得釋林尋逃歸江南平林
爲兄措資應試入泮又爲娶繼妻而以仲兄之子嗣
之欣然曰今而後兄安吾亦安矣

潘履和孝友素著咸豐庚申賊至城陷履和時患喉症
甚劇棄其妻子力疾負母而逃中途遇賊以身蔽母

被戕死

魏毓鼇字冠山州同銜父晉輝疾篤毓鼇顛天求代割股和藥以進遂瘳

魏承瀛太學生隨侍父駿猷涇陽縣署父疾篤剜左臂進不獲效居喪哀毀逾常

王發號則齋邑文生父士鉉得腹脹疾醫藥罔效發傍徨不知所為割股進卒不愈時發二十歲越十餘年母林氏疾篤發復以臂肉進尋愈

張縉號笏齋文童也父文燦母符氏文燦邁疾甚危嘗為父割臂既母病復割股以進遂愈

朱漢盛母丁氏病盛服賈遠方聞信冒雪兼程歸見病篤割臂肉和藥以進母尋愈

夏時瑤職員居邑之北鄉父惟鉅母徐氏昆弟五人時瑤居長事父母孝兄弟相處數十年無間言亂時仲弟洪昌被擄入城母朝夕悲痛瑤冒險覓昌卒得見弟不惜重賞贖出亂平疫大作瑤一家獨無恙人咸謂瑤之孝友所感云

徐彥卿幼業儒兄濟舟習醫彥卿終身不娶人請其故曰吾有弱疾兄有子吾助兄教之養之卽吾子也何娶為兄櫻疾湯藥不假婢僕兄歿撫兄子如己出教

之成名游邑庠每屆兄忌日輒痛哭流涕不能自己
潘芳棫字省山昆弟三人長芳樸次芳棫芳棫其季也
友愛性成芳棫得療疾醫家言服人參丸可延數月
但症終不起徒耗藥貲耳棫素儉約變產市參以進
病遂痊

